

In mais da pais

Las lingias grassas e finas dal zercladur 2021

DAVID TRUTTMANN/FMR

Quest artigel è il MDP. Gea, exact, il MDP – il «Mais da pais». Nus pudessan gea duvrar questa giada mo la scursanida da la rubrica mensila, perquai ch'il mais da zercladur 2021 è stà plain scursanidas.

Per entschaiver las pli impurtantas scursanidas da quests dis en furma da telegram: FRA-SUI 3:3. E s'enter prolungaziun e penaltis FRA-SUI 7:8. Perquai datti quest venderdi ESP-SUI.


Il deputà *Roman Cantieni* ha midà per immediat da la scursanida PCD tar la PS. El ha quasi prendì sez la scursanida dad ina partida tar l'otra. Sa chapescha ha el fatg quai or da profunda persvasiun politica, però in zichel era per calcul politic, per avair meglieras schanzas da restar deputà tar ina proxima elecziun «proporziunala». Quest calcul ha el era laschà valair en in'intervista cun la FMR. Nus pretendain però che in ulteriu argument per sia midada da partida n'ha el betg tradi – el po spargnar en avegnir in bustab cun denominar si'atgna partida. Damai èsi er ina midada per amur da la curtezza.

La buna tatta veglia engiadinaisa vul lera midar sia scursanida: La UdG. L'Uniun dals Grischs, l'uniun cultural-linguistica rumantscha da l'Engiadina, vul midar ses num. Il num na saja betg pli hip e cool e trendy, memia grisch e pallid, uschia ch'igl è in sgrisch per giuvs Engiadinais da s'engaschar en ina tala uniun. Per eruir in bun num ha l'uniun era laschà far propostas ses commembers e sias commembras, en vista a la radunanza generala da quest mais. Il resultat: la radunanza ha decis da tutina vulair restar (al mument) tar l'UdG. Facit: Ils paucs giuvs ch'èn al mument da la partida en l'uniun vegnan ad esser grischs ed alvs e pallids cura ch'i dat il battaisem per in nov num.

La NFO enconuschais vus però? – Quai è la «Nova Fundaziun Origen», l'uniun purtada dal festival cultural Origen. Damai, l'uniun da e cun *Giovanni Netzer*. La NFO descriva sias incumbensas lung e lartg sin sia homepage: «Per contanscher igl scopo dalla fundaziun, so la Nova Fundaziun Origen surtot acquistar, administrar e vender immobiglias, eriger e mantignair lis da teater, manar ensembles artistics, realisar exposiziuns, installar museums, surdar incumbensas da lavour, organisar represchentaziuns da gruppas ospitantas, s'occupar d'ediziuns, produtgier films, manar instituts, mantignair instituts scientifics e gestiuor la promoziun da lungatgs.» Sapperlot. Per bun rumantsch vul quai dir: la NFO po far tut! Da nov po ella perfin construir ina sort UFO en furma fallica amez Mulegns. E quai ensem cun la ETH e cun la benedicziun dal cusseglier federal, da la regenza gri-

schuna e da tut ils mastrals e da tut las presidentas da la regiun. Quels han numnadain tuts ensem fatg «wow» avant paucs dis tar la preschentaziun dal UFO da Mulegns. Però apunta: la NFO po gea far tut. Tgi vulesch schon metter en dumonda insatge?

L'entschatta dal mais ha DD entschet cun sia lavur tar la LR. Geabain, *Diego Deplazes*, il nov secretari general da la Lia Rumantscha. Ed ussa èsi era cler, pertge che Diego Deplazes è vegnì elegì en quel uffizi. Natiralmain sin basa da sia excel-



lenta annunzia.

Però quai che la publicitad na saveva betg en fin ussa: Sias inizialas èn identicas cun quella dal program strategic dals proxims onns da la LR - numnadain «DD»: diaspora e digitalisaziun. Lain sperar ch'in auter D na vegnia betg a travers – la demografia.

La PCD na datti betg pli. Sniff. La LPBD na datti betg pli. Sniff. Cun mintga scursanida e partida che svanescha, svaneschan er istorgias, battagliais, debattas, victorias, sconfittas etc. Insumma, ina scursanida è in entir microcosmos da vita e mainis. Ma en tut las fusiuns e discussiuns da las duas partidas n'ha nagin remartgà il pli impurtant: Il C resta. El duai viver vinavant en il AdC da l'Allianza dal center. Dieu saja ludà e tut ils sontgs cun el.

Dal rest, la nova AdC ha ussa in copresidi, cun l'Engiadinaisa *Aita Zanetti* e cun il Sursilvan *Kevin Brunold*. Las inizialas dad Aita Zanetti (AZ) han gronda simbolica, ella integrescha l'entir spectrum politic, ella rimna tut la gliuedad A en fin Z, pauper e grond, blond e verd, simpatic u social. E co statti cun las inizialas da Kevin Brunold, il KB? Cun sias inizialas po el rimnar e fructifitgar l'entira agricultura grischuna.

PUK. Gea, jau emprov da dir quella scursanida mo sut vusch: puk. La Cummissiun parlamentara d'inquisiziun (CPI u per bun rumantsch apunta PUK) ha preschentà quest mais ses segund rap-

port en la causa cartels: 478 paginas. Ed il rapport da pais vegn a la conclusiun che singuls uffizants chantunals n'hajan betg agi u reagi, s'enter che AQ aveva denunzià la praticas cartellisticas. Insumma, per dir quai che fiss da dir en quest connex mancan las scursanidas...

La EWZ – las ovras da Turitg – vendan pliras chasas en il Grischun Central, sco la FMR ha rapportà quest mais. Ils cumpraders èn ina gruppa da buns cumpels surmirans. Els cumpran las chasas a Casti e Tinizong per var 5 milliuns. Tge è spezial vi da quai? En sasez è quai mo in ulteriu pass per la retirada dals concerns idraulics or da las vals grischunas. Cura che las ovras eran vegnidas construidas, ils onns 50-70, eran vegnidas empermessas plazzas da lavur ed entradas da taglia en las regiuns. Entant pon las turbinas vegnir dirigidas davent da la glina u davent da Turitg, uschia ch'i dat mo pli paucas plazzas da lavur en la regiun. E las tagliais? Gea, nua paja la EWZ quella exact? Basta, las chasas èn anc restadas e pon damai patgific vegnir vendidas als indigens.

Falera di NA. NA ad in'emprima evaluaziun per ina fusiun cun ils vischins da Schluoin, Sagogn e Laax. NA è NA. In NA na dovra nagina scursanida.

ENa ha la Svizra era ditg quest mais al CO₂, respectiv a la lescha da CO₂. Però cun il resultat da votaziun dals 13 da zercladur na vegnan il proxim temp betg scursanidas las emissiuns da CO₂. Damai: la lescha ha fatg naufragi, la scursanida resta. Anzi, ella crescha.

Avessas gugent anc dapli scursanidas da quest mais? CB Surses, vacin da MRNA, URGC, WEKO, MRS, EURO 2021 e la TESSVM. Insumma, consultai las medias rumantaschas e vus chattais quella scursanida ed anc autras. Per exempel en LQ ch'ha in nov layout. Dal rest, la FMR giavischa a tuttas e tuts ina BS!

Tar l'illustraziun: MC, v.d. *Martin Cabalzar da Cumbel*, è in pensiu quest mais, s'enter esser stà passa 20 onns schefredactor da *La Quotidiana* ed in onn e mez anc vice-schefredactor da la FMR. Sut sia batgetta èn vegnidas realisadas passa 5000 gasettas da *La Quotidiana*.

Il mais da pais

Tgeninas èn stadas las lingias grassas e finas dal mais passà? Quai sa dumonda la redacziun da la FMR mintga fin dal mais. Tge paisa e tge paisa mo in zichel? Nus laschain repassar schabetgs, dain ina survista casuala e commentain quai cun in surrir. Mais per mais illustrescha il Bregagliot rumantsch *Jon Bischoff* il «mais da pais» cun in schurnal grafic. (fmr/dat)

MALaura



Betg ballas da tennis, mobain granella ch'è vegnida giu da tshiel ed ha fatg donnuns. FOTO CLAUDIA MEIER-BEELI

Granella sco ballas da tennis

Gia ils 22 da zercladur avevan fermis urizis furia sur parts da la Svizra Centrala e dal chantun Turitg. Culturas agriculas, tirc, tartuffels, legums e plantaschas d'ampuaunas ed autra pumaraida han patì grond donn. Inundaziuns en la citad da Zug e l'aglomeraziun han cumpletà la malaura. Glindesdi passà tard s'entermezdi, be in'emna s'enter questa tempesta, è in sumegliant fenomen meteorologic sa repetì en la medema regiun. Blers ortulans da hobi avevan gist fatg urden ed allontanà il verd destrui ch'ina nova unda da granella è ida tras la Svizra Centrala, Wädenswil en fin il Pfannenstiel sur il lai da Turitg. Questa giada dentant cun anc pli gronda vehemenza. Uschè gronds tocs da granella n'haja ella mai vesì, ha ina dunna rumantscha che abita a Steinhausen/ZG, rapportà. Ella ha tramess las cumprovas en furma da fotografia. Tocs da granella sco ballas da tennis. Tgi che era sut tetg ha pudì esser content. Dal rest n'ha la granella da glindesdi betg mo puspè fatg gronds donnas a culturas agriculas ed orts privats. Era tetgs e vehichels ora en il liber han survegni bleras bottas u schizunt rusnas. (fmr/abc)

TRAFFIC PUBLIC

Ils bus da notg circuleschan puspè tenor urari usità

A partir da proxim venderdi, ils 2 da fanadur 2021, vegn la purschida dals bus da notg puspè normalisada en l'entira Svizra s'enter ina pausa pli lunga causa la pandemia. Era ils bus da notg dal bus da Cuira ed il bus d'Engiadina circuleschan puspè tenor l'urari usità, sco la «Bus und Service AG» scriva en ina comunicaziun a las medias.

A Cuira èn pertutgadas suandantas lingias:
N1 Cuira – Razén – Tusaun – Farschno
N3 Cuira – Vaz Sut (notgs ve/so e so/du)
N13 Cuira – Landquart – Maiavilla (notgs ve/so e so/du)
N30 Cuira – Bogn Ragaz – Sargans – Buchs – Gams (notgs ve/so e sonda)
N32 Cuira – Vaz Sut – Landquart – Maiavilla (notgs du/gli en fin gie/ve)
N33 Cuira – Landquart – Tavau – Landquart – Cuira (notgs ve/so e so/du)

En tshertas fermadas dadur Cuira ston passagers avair ina reservaziun. Ins po s'annunziar sin la website dal bus da Cuira en fin in'ura avant la partenza.

En l'Engiadina èn pertutgads suandants trajects:

10 Ciuos-chel – Samedan – Puntraschigna
10 Puntraschigna – Samedan – Ciuos-chel
10 Puntraschigna – San Murezzan – Malögia
10 Malögia – San Murezzan – Samedan – Puntraschigna

Las colliaziuns ed ils temps da partenza pon ins consultar en l'urari sin la website dal bus d'Engiadina. (cdm/fmr)

CUMPRÀ

HEW e Kibag surpiglian Implemia Engiadina

En l'Engiadina surpiglian las firmas da construcziun HEW e KIBAG las unitads da producziun dad Implemia. Uschia surpiglian la HEW e la KIBAG er tut las 32 persunas che lavuran anc tar l'Implemia en l'Engiadina Ota e Bassa. Tenor la comunicaziun dad Implemia vegnan ils contracts da lavur surpigliads cun las medemas cundiziuns. Per l'unitad a Tavau vegnia anc tshertgà ina soluziun e per il personal a Cuira vegnian elavuradas schliaziuns internas sco er cun diversas interpresas da construcziun regiunales, scriva Implemia. Il concern da construcziun resta preschent en il Grischun sco impressari general. (cdm/trt/fmr)